

O ljekovitim izvorima vode na području Srebrenice, zna se vjekovima. O srebreničkoj mineralnoj vodi pisao je i poznati turski putopisac Evlija Čelebija. Zapisao je u 17. vijeku da na tom području iz jednog rudnika srebra izvire mala voda, pa ju je narod prozvao srebrnom. Godinama su ljudi iz cijele tadašnje Jugoslavije ali i brojnih evropskih država stizali u potrazi za lijekom za malokrvnost ili neko drugo oboljenje. Od brojnih izvora najpoznatiji je Crni Guber koji se nakon ratnog pustošenja, nastoji ponovo vratiti bolesnim ljudima.

Ljekari iz Srebrenice, Almir Pašagić, Radomir Pavlović i Suljo Čakanović, nastavljaju projekt liječenja ljekovitim vodama Crnog Gubera.

Voda i savjeti o načinu korištenja za pacijente biće besplatni u ambulanti svake subote i ponedjeljka dok se ne omogući tzv. banjско liječenje.

Projekat započet prije tri godine pokazao se veoma korisnim za pacijente koji su dolazili iz brojnih gradova regije, ističe doktor Radomir Pavlović, član projektnog tima.

“Rezultati se znaju, analize su dobre. Mi imamo šemu po kojoj radimo. Vi znate šta je Guber voda, da je to lijek. Ovdje može biti glavni centar za rehabilitaciju, poboljšanje krvne slike i liječenje drugih oboljenja i deficitarnih stanja, u ovom dijelu, ne samo Bosne i Hercegovine nego i cijele regije. Voda se nekada koristila kao lijek, izdavala na recept, u bivšoj Jugoslaviji se propisivala. Ljekovita svojstva i dalje postoje. Voda otiče u potoke”, kaže doktor Pavlović. Suljo Čakanović, koordinator projekta, navodi da nekontrolisana upotreba ljekovitih voda Crnog Gubera može imati kontraefekte. Tim ljekara pobrinuće se da daje savjete o pravilnoj upotrebi vode, što će biti besplatno.

“U Srebrenici je veliki broj izvorišta ljekovitih voda. Mi najviše koristimo izvor nazvan kožna voda, sinus voda, zatim voda obogaćena željezom, za anemiju. Tu su i izvori i očna voda koja pomaže ljudima sa upalnim procesima očiju. Nema tu nikakve dileme, očna voda neće povećati ili smanjiti dioptriju, ali može liječiti neke upalne procese”, kaže Čakanović.

“Mi pacijentima dajemo naše znanje i uputstva, kako ne bi nepravilno koristili ovu vodu, a svjedoci smo da su to pojedinci do sada činili. Pacijenti i dalje mogu dolaziti iz svih krajeva, nema nikakvih ograničenja. Sve usluge su besplatne, sa svim pacijentima ćemo lično doći na izvorište vode i nasuti vodu, mogu da pitaju za savjete, sve vezano za Guber vodu, mogu dobiti informacije, zakazivati termine za preglede, uz određenu analizu koju će ovdje raditi”, riječi su koordinatora projekta.

Voda Crnog Gubera u svakom momentu mora biti kvalitetna. O tome će se brinuti tim stručnjaka sa Tehnološkog fakulteta iz Zvornika koji će redovno vršiti analizu vode.

“Mi ćemo jednom mjesečno, dogovorili smo se, uzimati uzorke, kako u zimskom, tako u ljetnom periodu, poređićemo rezultate hemijskih analiza koje dobijemo u tim različitim periodima, čisto da bismo vidjeli da nema nekih uticaja u smislu povećanja količine

oborinskih voda na kvalitet i sadržaj aktivnih ljekovitih komponenti u vodama”, kaže docent Dragan Vujadinović.

Nastavak projekta imaće za cilj da se Banja Guber stavi u punu funkciju, ističe Suljo Čakanović.

“Nastavak ovog projekta znači jedan prelazni period, ovo o čemu je dr. Pavlović govorio, iz ovog nivoa pružanja zdravstvenih usluga do jednog višeg nivoa, sekundarnog ili tercijarnog, dakle jedan prelazni period i da animiramo sve odgovorne, one koji su zaduženi da pokrenu rad Guber Banje, da ona radi u svom punom kapacitetu, da oformimo i banjsko lječilište i sve drugo, da obogaćujemo i više nego što je bilo prije rata”, ističe Čakanović.

U opštini Srebrenica čine sve da se Banja Guber i pokrene.

“Mi smo radili taj master plan upravo iz tih razloga – da skrenemo pažnju ka Austriji, jer je Austro-Ugarska nekada ovdje bila izrazito prisutna, prvu bolnicu je ovdje napravila, regionalnu, 1883. godine. Naša zgrada Opštine je njihova zgrada. Mislimo da bismo zajedno mogli dobiti političku saglasnost za dugotrajno rješenje brojnih otvorenih pitanja oko Guber vode”, navodi dr Pavlović.

Postanak mineralnih izvora kod Srebrenice visokog kvaliteta, vezan je za različitu geološku građu i bogatstvo rudnih žica obojenih metala: srebra, olova cinka i gvožđa.

Nastaju tako što padavinska voda rastvara različite minerale, koji joj daju jedinstven kvalitet i značaj, čija ljekovita svojstva prevazilaze najpoznatije mineralne banje Evrope.

Izvor: slobodnaevropa